

宋史新編

宋史新編卷七十四

列傳十六

明南京戶部主事莆田柯維騏著

錢若水

從弟若冲

蘇易簡

郭贇

李至

辛仲甫

王沔

溫仲舒

王化基

子舉正舉元孫詔

錢若水字澹成一字長卿河南人父文敏歷官右贊善大夫知瀘州有政迹夷人詣闕借留太祖許之改殿中丞三遷司封員外郎又知洺州建昌軍卒若水爲舉子時陳搏謂之曰子神清可以學道不然當富貴但忌太速爾雍熙中舉進士釋褐同州觀察推官錄事嘗貧富

民錢不獲因其女奴亡遂誣父子謀殺而沉其屍獄成
若水獨留不決久之得女奴其人傾貲飯僧爲祈福寇
準薦文學高第召試翰林權祕書丞直史館歲餘爲右
正言知制誥詔詣原鹽等州制置邊事還奏合旨翌日
加職万員外郎除翰林學士掌草賜趙保忠及賜保吉
詔竝稱旨至道初擢同知樞密院事上嘗言士大夫遭
時顯榮得不竭誠圖報乎若水言高尚之人固不以名
位爲光寵忠正之士亦不以窮達易志操其或以爵祿
榮遇之故而效忠於上此中人以下者之所爲也時劉
昌言罷樞密上問趙鎔曰昌言涕泣否及呂蒙正罷相

上曰蒙正望復位之目穿矣若水念未嘗有秉節高邁
能全進退之道以感動人主故貽上之輕鄙遂草疏求
解職會晏駕不果真宗立加工部侍郎若水懇章避位
以爲集賢院學士又判流內銓從幸大名陳備禦之策
有曰孫武著書以伐謀爲主漢高將將以用法爲先今
傳潛領雄師數萬閉門不出坐視邊寇俘掠生民蓋潛
輩不能制勝朝廷未能用法使然也又曰太祖制置最
得其宜郭進在邢州李漢超在關南何繼筠在鎮定賀
惟忠在易州李謙溥在隰州姚內斌在慶州董遵誨在
通遠王彥昇在原州但授緣邊巡檢之名不加行營部

署之號率皆十餘年不易其任立邊功者厚加賞賚其
位皆不至觀察使故朝廷易制而諸將得以盡知邊事
所以十七年中北邊西蕃不敢犯塞苟能遵太祖故事
不數年間可致邊烽罷警矣俄知開封府上出手札訪
邊事若水陳五事曰擇郡守募鄉兵積芻粟革將帥明
賞罰出知天雄軍兼兵馬部署時言事者請城綏州以
備党項邊城互言利害詔若水馳往視之若水奏勞民
匪利復詣闕面陳遂罷役初若水率衆過河部伍咸有
節制爲戍將推服上嘉嘆曰若水儒臣中知兵者也遣
巡撫陝西緣邊諸郡令便宜行事還拜鄧州觀察使并

代經略使知并州因疾灸兩足創潰出血數斗自是體羸手詔慰勞俾歸京師卒年四十四贈戶部尚書錄其子賜母白金五百兩後復遣使存問焉若水美風神有器識事繼母孝尤輕財好施所至委誠待物汲引後進推賢重士襟度豁如也有集二十卷

蘇易簡字太簡銅山人父協舉蜀進士歸宋累遷光祿寺丞易簡風度奇秀才思敏贍甫弱冠舉進士太宗臨軒覆試二千餘言立就擢冠甲科解褐將作監丞通判昇州三年中遷至右拾遺知制誥雍熙二年同知貢舉有詔凡親屬就舉者籍名別試易簡妻弟崔範父喪

充貢奏名在上第又王千里者水部員外郎孚之子協
爲學門生千里預薦上聞坐範及千里罪易簡緣是罷
知制誥旣而復之又充翰林學士淳化二年遷中書舍
人易簡續唐李肇翰林志二卷以獻帝賜詩嘉之帝嘗
以輕綃飛白大書玉堂之署四字令易簡榜於廳額他
日易簡直禁中以水試欵器上密聞之因晚朝問曰卿
所玩得非欵器耶易簡曰然江南徐邈所作也命取試
之易簡奏曰願陛下持盈守成慎終如始以固丕基則
天下幸甚遷至給事中參知政事時趙昌言與同列頗
不協至忿爭上前未幾昌言出使劔南中路改知鳳翔

府明年易簡亦以禮部侍郎出知鄧州移陳州辛年
十九贈禮部尚書易簡外雖坦率中有城府屬文初不
達體要及掌誥命頗自刻勵在翰林八年眷遇夙絕倫
等以親老急於進用因亟言時政闕失遂參大政父執
友何光逢坐賂削籍流寓京師會易簡典貢部代人充
試以取貲易簡於稠人中屏出之光逢遂造謗書斥言
朝廷事且譏易簡易簡以聞坐棄市母薛氏切責之上
嘗召薛入禁中賜冠帔命坐且以孟母獎焉易簡性嗜
酒初入翰林謝日飲已微醉餘日多沉湎上戒約且草
書勸酒二章以賜令對其母讀之自是每人直不敢飲

及卒上曰易簡果以酒死可惜也雅善筆札尤善談笑
旁通釋典所著文房四譜及文集二十卷

郭贇字仲儀開封人乾德中舉進士中首薦太平興國
初擢著作佐郎兼皇子侍講太宗出戒子篇命注解爲
諸王講說三年遷右補闕拜中書舍人賜金紫七年遂
參知政事曹彬爲弭德超所誣極言救解嘗因論事奏
曰臣受不次之遇誓以愚直上報帝曰愚直何益於事
贇言雖然猶勝姦邪無何以宿醒人對左遷知荆南府
歷工部侍郎知審官院通進銀臺封駁司真宗卽位歷
知河南府上嘗稱贇純厚長者擢至禮部尚書卒年七

十六贈左僕射謚文懿贊屬文敏速而不雕刻集三十
卷賜名文懿集性溫和頗能延譽時雋宋白以文學沉
下位贊薦引之遂同掌誥命然吝嗇切於治生晚節不
事事云

李至字言幾真定人幼沉靜好學能屬文及長辭華與
瞻第進士累遷右補闕知制誥太平興國八年自翰林
學士拜右諫議大夫參知政事雍熙初加給事中時議
親征范陽至上疏陛下恭守宗廟不離京國示敵人以
閒暇慰億兆之仰望策之上也大名河朔之咽喉或暫
駐鑾輅揚言自將以壯軍威策之中也若乃遠提師旅

親抵邊陲北有契丹之虞南有中原之慮則曳裾之懇
切斷鞅之狂愚臣雖不肖恥在二賢後也至以目疾累
表求解機政授禮部侍郎進吏部兼祕書監上嘗幸祕
閣賜草書十字文至勒石上曰千文乃梁武得破碑鍾
繇書命周興嗣次韻而成理無足取若有資於教化莫
孝經若也乃書以賜淳化五年兼判國子監上言二傳
二禮孝經論語爾雅七經之疏未備望令崔頤正等重
加讎校以備刊刻從之後又引杜鎬等檢正譌謬至與
李沆總領而裁處之真宗爲太子沆與沆竝兼賓客詔
太子事以師傅禮卽位拜工部尚書參知政事一日上

訪靈武事至上疏曰繼遷異類騷動疆場然膂不足弭其患擢髮不足數其罪然聖人之道務屈已含垢以安億民蓋所損者小所益者大或指靈州爲咽喉之地安可棄之以爲敵有此不智之甚非臣所敢知也後靈武卒不能守咸平初復以疾請授武信軍節度入辭節制不允居二年徙知河南府四年以疾求歸鎮許之詔甫下卒年五十五贈侍中至剛嚴簡重人士罕登其門性頗吝嗇幼育於飛龍使李知審及貴卽逐其養子以利其資知審因至亦至右金吾衛大將軍

辛仲甫字之翰汾州人少好學及長能吏事偉姿儀器

局沉厚仕周歷深趙鎮觀察判官太祖受命遷至右補
闕歷知彭州課民植柳蔭行路人名爲補闕柳帝問羣
臣文武兼資者爲誰趙普以仲甫對徙益州兵馬都監
代還選爲三司戶部判官太宗遷起居舍人奉使契丹
其主欲留之仲甫曰信以成命義不可留有死而已竟
不能屈使還以刑部郎中知成都府政尚寬簡蜀人安
之累擢參知政事時呂蒙正以長厚居相位王沔任事
仲甫從容其間而已淳化二年以足疾罷爲工部尚書
出知陳州代歸以太子少保致仕真宗加太子少傅卒
年七十四贈太子太保孫有孚有鄰俱進士

王沔字楚望齊州人太平興國初舉進士解褐大理評事端拱初爲戶部侍郎參知政事淳化元年宰相趙普出守西洛呂蒙正以寬簡自任事多決於沔沔初與張齊賢同簽書樞密頗不叶齊賢出知代州沔遂爲副使鹽鐵使陳恕好奇察又嘗與沔忤二年齊賢恕亦參知政事沔頗疑慮上知之沔暨恕竝罷沔見上涕泣不願離左右未幾鬚鬢皆白上欲黜陟官吏命沔同知京朝官考課立法苛察欲因是求再用受命旬日暴卒年四十三贈工部尚書沔聰察敏辯有適時之用上前言事能委曲敷釋每對御讀所試進士辭賦音吐明暢經讀

者多中高第性刻少實掌機務日凡謁見者啗以甘言
皆喜過望旣而進退非允人胥怨之沔弟淮亦進士至
殿中丞以賊薄謫爲寇準所詆云

溫仲舒字秉陽河南人太平興國二年第進士歷祕書
丞知汾州坐事除名未幾復起歷工部郎中樞密直學
士知三班院時彗星見召對別殿仲舒以爲國家平太
原以來燕代之交殺傷剽掠大河以北戶口減耗願推
恩宥以綏民庶上嘉納之淳化二年爲右諫議大夫同
知樞密院事四年罷知秦州先是俗雜羌戎爲平民患
仲舒歷按諸砦諭其酋以威信諸部獻地內屬旣而悉

徙其部落於渭北立堡砦限之民感其惠爲畫像祠焉
有以生事爲言者乃命知鳳翔連知興元江陵二府加
給事中會內侍監繼宗使秦州還言得地甚利乃召拜
戶部侍郎尋參知政事二砦後爲內地歲獲巨木之利
咸平初拜禮部尚書罷知河陽歷徙河南復知審官院
大中祥符中進戶部尚書又判昭文館大學士命下卒
年六十七贈左僕射諡恭肅仲舒敏於應務少與呂蒙
正契厚又同登第仲舒黜廢累年蒙正居中書極力援
引及被任用反攻蒙正士論薄之自爲正言至貳樞密
皆與寇準同進時人謂之溫寇

王化基字永圖鎮定人太平興國二年第進士累遷右拾遺抗疏自薦太宗曰化基自結人主慷慨之士也召試知制誥以右諫議大夫權御史中丞一日侍便殿問以邊事對曰治天下猶植木焉根本固則枝幹不足憂嘗慕范滂爲人獻澄清略言時事有五其一復尚書省曰請廢三司止於尚書省設六尚書分掌其事廢判官推官設郎官分掌二十四司及左右司公事使一人掌一司廢孔目勾押前後行爲都事主事令史廢勾院開折磨勘憑由理欠等司歸比部及左右司如此卽事益精詳且盡去州郡吏局之名也其二慎公舉曰陛下自

登寶位十年于茲七經選掄得人多矣然下僚遠官
無沉滯望令採訪司及州郡長吏廉察以聞籍以待用
其三懲貪吏口用非其人而不繩以法雖夷齊顏閔不
能自見蓋中人之性如水之在器方員不常顧用之者
何如爾望令諸路轉運使副兼採訪之名責以覺察其
四省冗官曰朝官諸色使臣及縣令簿尉等高卑相折
而計之一人月費不啻十千以千人約之歲計用十餘
萬千更倍萬約之萬又過倍使皆廉吏止廢公帑設或
貪夫參錯其間則取於民者又加倍焉望委各路裁減
凡縣令簿尉不必備置其五擇遠官曰負罪之人多非

良善其或怙惡不悛恃遠肆毒甚非撫綏遠人之意也
書奏上嘉納之初柴禹錫任樞密有奴受人金參知政
事陳恕欲因以中禹錫上怒引囚訊其事化基爲辨其
誣上感悟以化基爲長者至道三年超拜參知政事咸
平四年以工部尚書罷知揚州移知河南府進禮部尚
書卒年六十七贈右僕射謚惠獻化基在中書不以蔭
補諸子官然善訓飭故其子舉正舉直舉善舉元皆有
所立

舉正字伯仲以蔭補祕書省校書郎進士及第歷知制
誥爲翰林學士拜右諫議大夫參知政事仁宗曰卿恬

於進取未嘗干朝廷以私故不次用卿歐陽脩等論舉
正懦默不任事遂自求去以資政殿學士禮部侍郎知
許州徙應天府累遷左丞皇祐初拜御史中丞奏張堯
佐庸人緣妃家一日領四使使賢士大夫無所勸不報
舉正因留班廷諍乃奪宣徽景靈二使御史唐介貶春
州舉正力言之得徙英州居半歲堯佐復爲宣徽使家
居凡七上疏及狄青爲樞密使又言青出兵伍不可爲
執政力爭不能奪因請解言職帝稱得風憲體就第賜
白金除觀文殿學士禮部尚書知河南府又兼翰林侍
讀學士以太子少傅致仕卒贈太子太保諡安簡舉正

文章雅厚如其爲人有平山集中書制集內制集五十卷

舉元字懿臣以上父章賜進士出身歷官中外至給事中其爲河東轉運使也夏人來爭屈野地舉元從數騎度河設幕與之議示以赤心夏人感服最後爲河北都轉運使知永興軍慶人夏人屯境上有窺我意舉元使二裨將以千騎扼要害不待交兵遂解去神宗以細札諮政守策舉元請省官減戍益備去兵勿營亭障以興論不合引疾徙陳州未行卒子詔

詔字景獻用蔭歷度支部中使契丹時方討西夏迂者

耶律誠欲嘗我言曰河西無禮大國能容之乎詔曰夏人侮邊旣正其罪矣何預兩朝和好事入賀故事跪而飲蓋有誤拜者乃彊詔詔曰南北百年所守者禮可紛更耶卒跪飲之崇寧中歷司農卿御史論詔在滁州日請蘇軾書醉翁亭碑罷奉祠累遷戶部侍郎轉開封尹時子璘使京西攝尹洛父子兩京相望人以爲榮進刑部尚書拜延康殿學士提舉上清寶籙宮復爲工部尚書未幾以銀青光祿大夫致仕卒

論曰宋制中書樞密竝設副貳以參大政贊翼機必其人明敏達世務迺克勝任加以文章檢操進退有禮斯

謂完德如錢若水是已蘇易簡沉酣無節失之放溫仲舒以怨報德失之薄辛仲甫委權同列失之怠郭贄營生業李至利人之貲失之陋王沔罷政祈哀王化基抗章自薦失之競然或以詞華或以吏局篤厚可以敦俗嚴明可以集事各有所長誰能掩之且化基之子若孫歷顯劇播聲譽又足徵其家範焉大抵喜功者略細行持重者乏異能古人所以歎才難也若易簡輩太宗愛護而器使之善夫

張宏

趙昌言

陳恕

魏羽劉式附

劉昌言

張洎

李惟清

張宏字巨卿青州人太平興國初第進士歷主客郎中
史館修撰太宗召對便殿謂曰成都重地卿爲朕鎮之
因厚賜以遣至鄭州促召歸闕拜右諫議大夫樞密副
使時河朔用兵宏無所建白御史中丞趙昌言多言邊
事乃兩更其職端拱初改工部侍郎還樞密淳化中以
吏部侍郎罷俄判吏部銓權知開封府徙知潞州就轉
右丞真宗加工部尚書後還朝知審官院通進銀臺封
駁司又知登聞鼓院再掌吏部選卒年六十三贈右僕
射宏循謹守位不求赫赫名歷踐通顯未嘗敗事

趙昌言字仲謨汾州人太平興國二年舉進士廷試日

太宗見其辭氣俊辯擢眞甲科歷御史中丞上宴金明池特召預焉憲官從宴自昌言始也河東用兵代張宏爲樞密副使語在宏傳遷工部侍郎時鹽鐵副使陳象與與昌言善知制誥胡旦度支副使董儼皆昌言同年右正言梁顥嘗在大名幕下四人者日夕會昌言第京師爲之語曰陳二更董半夜有傭書翟穎性險誕與旦狎旦爲作大言之辭使穎上之爲穎改姓名馬周以爲唐馬周復出也其言多毀時政期昌言爲內應昌言坐貶崇信軍節度行軍司馬初上厚遇昌言趙普以昌言樹黨再勸上誅之上特寬焉淳化二年起知蔡州逾年

召拜右諫議大夫或議弛茶鹽禁以省轉漕命昌言爲江淮兩浙制置茶鹽使昌言極言非使上不納趣昌言往昌言固執如初卽以戶部副使雷有終代之卒以無利而罷昌言復知天雄軍賜錢二百萬屬澶州河決流入御河漲溢浸府城昌言籍府兵負土增隄索禁卒佐役不浹旬城完上手詔褒諭召拜給事中參知政事王小波李順構亂于蜀昌言獨請發兵無使滋蔓廷論未決會嘉眉連陷始命王繼恩等分路進討繼恩御衆寡術餘寇未殄郡縣復有陷者上意頗厭兵召昌言謂曰西川本自一國太祖平之訖今三十年矣昌言知意卽

前指畫攻取之策上喜命爲川峽五十二州招安行管馬步軍都部署自繼恩以下竝受節度旣行有奏昌言無嗣鼻折三根頗有反相不宜遣握兵後旬日上召宰相議令昌言且駐鳳翔止遣內侍齎手書指揮軍事詔書追及昌言已至鳳州留候館百餘日賊平改戶部侍郎罷政事知鳳翔府徙澶涇延三州真宗卽位歷工部尚書兼中丞會按任懿獄坐王欽若欽若自訴語在欽若傳昌言以故人貶安遠軍行軍司馬移武勝軍後拜刑部侍郎歷知天雄軍徙知鎮州遷戶部侍郎卒年六十五贈吏部尚書諡景肅昌言喜推獎後進李沆判潭

州謂有台輔之量表于朝王旦爲縣令一見識其遠大妻以女王禹偁自平秩擢詞職亦所薦也昌言強力尚氣槩當官無所顧避所至以威斷立名屢經擯斥未嘗少自抑損然剛愎縱率倨慢僚吏時論少之

陳恕字仲言南昌人少爲縣吏折節讀書太平興國二年進士解褐大理評事通判澧州以吏幹聞再遷左拾遺充度支判官與判使王仁贍爭事上前仁贍坐貶秩連擢恕工部郎中知大名府時契丹內寇受詔增浚城隍數日功就歷右諫議大夫知澶州驛召爲河北東路營田制置使太宗諭以農戰之旨恕對曰古者兵出於

民今之戎士皆以募致衣食仰給縣官萬一生變悔無及矣營田之議遂寢俄知代州入判吏部選事拜鹽鐵使恕有心計宿弊悉釐去太宗親題殿柱曰眞鹽鐵陳恕遷給事中參知政事數月以泄禁中語罷事在樊知古傳中旋出知江陵府淳化中召爲工部侍郎充總計使歲餘復爲鹽鐵使太宗留意金穀召三司吏李溥等二十七人對崇政殿詢以計司利害謂宰相曰溥等頗有所長朕嘗語恕等文章稽古此輩固不可望若錢穀利病頗自幼至長寢處其中必周知根本卿等假以顏色引令剖陳必有所益恕等剛強終不肯降意詢問呂

端對曰耕當問奴織當問婢寇準曰夫子入太廟每事問乃以貴下賤先有司之義後太宗召恕等責以職事曠廢恕等對曰臣等駑力惟盡心簿領終不足上裨聖治太宗曰卿等清而不通專守繩墨終不能爲國家度長絜大剖煩析滯恕等頓首謝至道二年欲併三司命官總判其勾院磨勘理欠憑由支收行帳提點等司令恕條列其事以聞恕奏三司之中簿牒填委官吏救過不暇若各設主司事辦過鮮不撓上心此亦一時良策其勾院磨勘兩司出於舊制關防之要莫加於此逋欠無失理之名憑由鮮流散之弊而主轄支收以謹出納

亦爲允當其行帳司近日權置了絕舊帳帳目告盡司額自除若提點司是中旨特置提振三司廢怠之事固非有司敢擬議也詔三司都憑由理欠司合爲一命官兼判餘悉從恕奏恕將立茶法召茶商數十人俾各條利害第爲三等曰中等公私皆濟吾裁損之可以經久於是始爲三法行之貨財流通恕每便殿奏事太宗或未深察必形誚讓恕退至殿壁負立若無所容俟意稍解復執奏或至三四太宗以其忠多從之遷禮部侍郎真宗卽位加戶部命條具中外錢穀以聞恕久不進屢趣之恕曰陛下富於春秋若知府庫充實恐生侈心臣

是以不敢進真宗嘉之咸平五年知貢舉恕自以洪人
避嫌凡江南貢士悉被黜退又援貢舉非其人之條所
取甚少首薦則王曾也及廷試糊名考校曾復得甲科
每自歎曰吾得曾名世才也不愧於知人矣恕事母孝
母亡哀慕過甚遂至羸瘠起復視事遷尚書左丞權知
開封府恕病劇表求館殿獲奉以濟其貧真宗曰卿求
一人可代者是時寇準罷樞密使恕卽薦以自代遂以
準爲三司使恕爲集賢學士判院事準檢尋恕前後興
革事類爲冊及以所出榜別用新板躬至恕第請判押
恕亦不讓至李諮爲三司使始改茶法恕之規模漸革

宋史紀事本末卷之十四
二
矣恕未幾卒年五十九贈吏部尚書恕頗涉史傳多識
典故精於吏理深刻少恩人不敢干以私素不喜釋氏
嘗請廢譯經院真宗曰三教之興其來已久但存而不
論可也子執中別有傳

魏羽者字垂天婺源人少能屬文上書李煜署爲雄遠
軍判官宋師出其境羽以城降太祖擢爲太子中舍仍
舊職金陵平入朝出知興州太平興國中受詔詣瀛州
覆軍市租得隱漏數萬計因上言本州錄事叅軍郭震
十年未代河間令崔能未滿歲遷秩有司調選失平疏
遠何由聞達請罪典司以肅欺弊上賜詔褒諭歷左諫

議大夫拜度支使改鹽鐵使會併三部爲一司以羽判
三司未久出知滑州丁內艱起復加給事中徙潭州真
宗卽位遷工部侍郎再爲戶部度支使咸平四年以疾
疏求解職拜禮部侍郎卒羽涉獵史傳好言事嘗建議
有唐以來凡制詔皆經門下省審有非便者許其封駁
請遵故事擇名臣專領其職遂爲故事太宗嘗謂左右
曰羽有心計亦明吏道但無執守與物推移耳歷劇職
十年始踰四十鬚鬢盡白亦可憐也羽習知金穀之事
然頗傷煩急不達大體同時又有劉式者

式字叔度袁州人李煜時舉三傳中第歸宋久任計司

遷至刑部員外郎賜金紫初端拱中初三年磨勘之法
首以式主之又建議置主轄支收司時以爲當後領三
勾院多所條奏檢校過峻爲下吏所訟免官卒真宗錄
其子立本弟立德立禮竝進士及第

劉昌言字禹謨南安人少篤學文詞靡麗節度陳洪進
辟功曹叅軍太平興國二年洪進歸朝改鎮徐州又辟
推官八年舉進士得第累遷左司諫廣南安撫使淳化
初趙普留守西京表爲通判委以府政普疾亟屬後事
昌言感普知已經理其家太宗以爲忠於所舉拜起居
郎賜金紫錢五十萬連對三日皆至日旰昌言捷給談

詭能揣人主意無不稱旨太宗謂宰相曰昌言質狀非
偉若以貌取失之子羽矣連遷右諫議大夫同知樞密
院事昌言驟用不爲時望所伏或短其閩語難曉又短
其委母妻十餘年不迎侍別娶旁妻太宗旣寵之詔令
迎歸京師本州給錢辦裝縣次續食昌言自以登擢非
次懼人傾奪會誅凶人趙贊昌言與贊素善前在河南
嘗保任之心不自安因太宗言及近侍有與贊交者昌
言蹶然出位頓首稱死罪太宗慰勉之然自此惡其爲
人以給事中罷出知襄州徙知荆南府真宗卽位就拜
工部侍郎辛年五十八贈工部尚書

張洎全椒人少有俊才江南舉進士解褐上元尉擢監察御史李煜嗣立擢至中書舍人清輝殿學士叅預機密恩寵第一洎舊字師黯改字偕仁王師圍城踰年洎勸煜勿降苟一旦不虞卽臣當先死旣而城陷洎給光政使陳喬同升閣欲與俱死喬自經氣絕洎反下見煜曰臣與喬同掌樞務國亡當俱死又念主在誰能爲主白其事不死將有以報也歸朝太祖召責之洎頓首請罪曰犬吠非其主今得死臣之分也辭色不變上奇之貸其死拜太子中允太宗卽位以其文雅選直舍人院考試諸州進士歷遷禮戶二部郎中端拱初太常定錢

俶謚洎判考功爲覆狀經尚書省集議虞部郎中張泌
奏駁其狀有曰亢龍無悔非臣子所宜言事下中書以
詰洎對曰故秦國王處崇高之富貴絕纖介之譏嫌故
考功覆狀云所謂受寵若驚居亢無悔者也謹按易乾
之九三云君子乾乾夕惕若厲无咎王弼注云處下卦
之極愈於上九之亢易例云初九爲元士九二爲大夫
九三爲諸侯楊植許由碑云錙銖九有亢極一夫杜鴻
漸讓元帥表云祿位亢極過踰涯量李翰書霍光傳云
有伊周負荷之明無九三亢極之悔張說祈國公碑云
一無目牛之全一無亢龍之悔也况狀內無亢龍無悔

之語請反坐以懲姦妄似坐奪俸洎歷擢中書舍人充翰林學士上顧謂近臣曰學士之職清要貴重非他官比朕常恨不得爲之俄判吏部銓嘗引對選人上又謂近臣曰張洎富有文藝至今尚苦學江東士人之冠也會皇子益王元傑改封吳王行揚州潤州大都督府長史領淮南鎮江兩軍節制洎當草制因上疏議曰謹按前史皇子封王以郡爲國置傅相及內史中尉等佐王爲治其大都督之號非親王不授今益王建社爲吳國王居大都督之任又已正領節度事豈宜却加長史之號乃是國王自爲上佐矣宰相以制命已行難於追改

泊人上表論列呂蒙正言越王爲長史而吳王獨爲
都督居其上非便上令俟異日除授并改爲泊博涉經
史多知典故上賜詩褒美有翰長老儒臣之句與蘇易
簡同在翰林尤不協及易簡參知政事泊多攻其失經
而易簡罷卽以泊爲給事中參知政事與寇準同列生
寇準知吏部選事泊掌考功爲吏部官屬準年少新進
氣銳思得老儒附已以自大泊夙夜坐曹視事每冠帶
候準出入於省門揖而退不交一談準益重焉因延致
語泊捷給善持論多爲準規畫準心伏乃兄事之極口
談泊於上上欲進用又知其在江左日多讒毀良善本

煜殺潘佑泊嘗預謀心疑焉翰林待詔尹熙古吳郢皆江東人泊嘗善待之上一夕召熙古輩侍書禁中因問以佑得罪故熙古言非泊謀乃煜忿其諫說太直耳自是洗然遂加擢用蓋準推挽之也旣同秉政奉準愈謹政事一決於準無所叅預專脩時政記甘言善柔而已後因奏事異同準復忌之至道二年繼遷寇靈州詔呂端等各以所見畫策呂端等詣上言曰詢謀僉同宜共爲一狀陳利害不必各述所見泊越次奏曰端等緘默不言深失訏謨之體端曰泊欲有言不過揣摩陛下意耳翌日泊上䟽願棄靈武上嘗有此意旣而悔之泊果

迎合覽奏不悅旣以疏付洎謂之曰卿所陳朕不曉
句洎惶恐而退上召同敝中等謂曰張洎果爲呂端所
料時上已嫉準專恣心寵衰替洎旣議事不稱旨慮一
旦同罷免因奏事大言寇準退後多誹謗準色變不敢
辯上由是怒準旬日罷未幾洎病以刑部侍郎罷奉詔
尋咽疾遂亟卒年六十四贈刑部尚書洎風儀灑落兼
通禪寂終日清談豐臚可聽性險詖好攻人之短李煜
旣歸朝貧甚洎猶丐索之煜以白金類面器與洎洎尚
未滿意尤善事內宮引唐故事奏內供奉官藍敏政爲
學士內侍裴愈副之上曰朕安可踵此覆轍平生鄙吝

雖親戚少靈及江表故舊亦罕登其門有文集行于世
李惟清字直臣下邑人開寶中以三史解褐涪陵尉遷
大理寺丞太平興國中歷度支判官至主客員外郎雍
熙三年許仲宣建議通鹽法以賣鹽歲課賦于鄉村與
戶稅均納惟清奉詔往荆湖諸路詳定奏言非便遂罷
使還出爲京東轉運使會募丁壯爲義軍惟清曰若是
天下不耕矣三上疏諫繇是獨選河北而餘路悉罷累
遷給事中充鹽鐵使以帳式奏御太宗曰費用若此民
力久何以堪如可減省即便裁度對曰漢有衛青霍去
病唐有郭子儀李晟西北望而畏之如此則邊事息矣

支用減矣上言今之西北變詐與古不同選用將帥亦
須深體今之幾宜韓彭雖古名將以彼時之見制今之
敵亦恐不能成功今縱得人未可便如古委之此乃機
事卿所未知也因事左授衛尉少卿俄出知廣州至道
初就拜右諫議大夫以廉平聞詔獎之二年同知樞密
院事惟清有鉤距臨事峻刻所至稱強幹然以俗吏進
無人望真宗卽位加刑部侍郎復除御史中丞旣去樞
要怫鬱尤甚肆情彈擊年五十六卒贈戶部尚書

論曰張宏以文行被遇太宗由呂蒙正張齊賢諸大臣
爲之薦譽又歷通顯少敗事亦不負所知已真宗眷王

欽若厚趙昌言投獄不之避氣槩類此何論樹黨細過
乎陳恕父典計司爲宋能吏稱首其卒也張詠稱惟公
惟正爲國家斂怨於身再三嘆不易得况平生於孝最
隆哉劉昌言忠所舉而官不恩母妻厚薄失措徒以詆詭
便捷登擢不次非倖歟張洎不爲李煜死忍負陳喬後
來揣摩反覆宜無所不至也李惟清罷樞府入臺意爲
宰相呂端所抑而彈擊構陷以逞其私獨謂之俗吏已
耶

宋史新編卷七十五

列傳十七

明南京戶部主事莆田柯維騏著

柴禹錫

張遜

楊守一

趙鎔

周瑩

王繼英

王顯

柴禹錫字玄圭大名人少時有客見之曰子質不凡若
輔以經術必致將相由是留心問學太宗居晉邸以善
應對獲給事焉卽位累遷宣徽北院使告秦王廷美陰
謀擢樞密副使轉南院使雍熙中議廣宮城禹錫有別
業在表識中請以易官邸上因是薄之又與宰相宋琪

厚善爲請盧多遜故第上惡其朋比以驍衛大將軍出知滄州在任勤於政治部民列狀以聞歷知潞州州民乞留三載詔獎之徙知永興軍府再召爲宣徽北院使知樞密院事至道初制授鎮寧軍節度知涇州真宗移知貝州徙陝州孫宗慶選尚召歸闕令公主就第謁見行舅姑禮還鎮卒年六十二贈太尉宗慶有傳

張遜高唐人太宗在晉邸隸帳下卽位補左班殿直再遷香藥庫使嶺南平後交趾歲入貢通關市竝海商人遂浮舶販易外國物占城諸國亦歲至朝貢由是犀象香藥珍異充溢府庫遜請於京置權易署稍增其價聽

商入金帛市之恣其販鬻歲可獲錢五十萬緡以濟經費上允之自是歲有增羨歷授宣徽北院使簽署樞密院事未幾兼樞密副使知院事與同列寇準不協因事爭辯上前互發其私語在準傳帝下詔切責遂左降右領軍衛將軍準亦罷職遂歷右驍衛大將軍知江陵府卒年五十六贈桂州觀察使遂小心謹慎徒以攀附至貴顯其計謨獻替無聞焉

楊守一字象先洛陽人稍通周易及左氏春秋事太宗於晉邸卽立補右班殿直累遷翰林學士初名守素至是詔改之與趙鎔等告廷美陰謀擢至宣徽北院使簽

署樞密院事平年六十四贈太尉守一質直勤謹無他
材術適會時機歷職通顯飾終之禮率加常數焉

趙鎔字化鈞滄州人以刀筆事太宗於藩邸勤慎被眷
卽位歷內酒坊副使嘗告廷美陰謀擢至宣徽北院使
同知樞密院事與柴禹錫並掌機務嘗遣吏卒散之京
城察事卒乘醉與賣書人韓玉鬪毆不勝因誣玉言涉
指斥禹錫等遽以聞玉坐抵法太宗尋知其冤自後廉
事不復聽禹錫出鎮鎔加知院事真宗卽位改南院使
檢校太傅以疾授壽州觀察使卒年五十五贈忠正軍
節度鎔少涉獵文史美書翰本名容太宗改爲鎔曰陶

鎔所以成器也

周瑩景城人右領軍衛上將軍景之子太宗潛邸時給事左右卽位補殿直累擢杭睦五州都巡檢使兼杭州都監會妖僧紹倫爲變瑩擒獲就戮者三百餘人人以爲酷濫歷拜客省使簽書樞密院諸房公事真宗嗣位拜宣徽北院使先是宣徽著位在樞密副使上瑩表請居下從之遷南院使知樞密院事旣而高陽關都部署闕上以瑩練達軍事拜永清軍節度兼領其任爲三路排陣使景德初丁內艱起復爲天雄軍都部署兼知軍府事嘗召洛州騎士千五百人赴大名道與寇直力戰

有死傷者瑩猶謂其玩寇將悉誅之詔賜金帛諭瑩勿治其罪歷知澶州大中祥符初改天平軍節度明年爲鎮定都部署兼知定州轉運使奏其曠弛徙知澶州境內屢有寇盜宰相以瑩不能以威望鎮靖請徙他郡上曰處之閒僻適使其自偷爾遂下詔督責以疾求還京師卒年六十六贈侍中謚元惠瑩居樞近無他謀略及涖軍旅歷蕃鎮功業無過人者東封歲瑩鎮澶淵車駕所經故特有衣帶器帛之賜非故事也祀汾陰瑩知定州乃預上言禮成所賜望於治所支給人咸笑之王繼英祥符人少從趙普給筆札普罷相從者皆去繼

英趨事逾謹普再入相真宗在藩邸選爲導吏太宗召
謂曰汝昔事趙普朕所備知今奉親賢尤宜盡節及建
儲授左清道率府副率兼左春坊謁者謁者本宦職副
率品秩頗崇俾兼領之執政誤也直宗卽位累拜宣徽
北院使同知樞密院事小心慎靖以勤敏稱上倚賴之
景德初授樞密使嘗因進補軍校白上曰疎外之人急
於攀附者謂臣蒙蔽不爲薦引上曰此輩亦須因事立
功方許擢用不可過求僥倖從幸澶州契丹請和諏訪
經略繼英預焉郊祀加特進檢校太傅卒年六十一贈
太尉侍中謚恭懿

王顯字德明開封人給事太宗藩邸性謹介不好狎昵
嘗踐市肆卽位補殿直數進擢八年中至樞密使上謂
之曰卿典機務無暇博覽群書能熟軍戒三篇亦可免
於面墻矣因取是書及道德坊宅一區賜之副使趙昌
言寇準鋒氣皆銳慢顯顯或失誤護短終不肯改上每
面戒之淳化二年八月詔加切責黜授隨州刺史充崇
信軍節度觀察等使遣之任俄知永興軍徙延州移知
秦州咸平初入朝改橫海軍節度知鎮州二年復拜樞
密使郊祀加檢校太師三年春改授山南東道節度同
中書門下平章事定州路行營都部署河北都轉運使

兼知定州吏民言顯治狀願借留明年加鎮定高陽關三路都部署許便宜從事十月契丹入寇顯大破之明年改河陽三城節度時議親征契丹顯言盛寒在序敵未犯塞鑾輿輕舉直抵窮邊寇若不逢師乃先老况今繼遷未滅西鄙不寧儻北邊部落與之結援則中國之患未可量也景德初徙知天雄軍府上表請赴行在從之是秋遣還鎮契丹入寇上議親征顯復陳三策已而契丹請盟趙德明遣使脩貢稱藩朝廷加賞錫且許通青鹽以濟邊民從顯之請也三年冬被病明年許還京師卒年七十六贈中書令謚忠肅初吏軍司時張永德

爲殿前都點檢及顯自樞密鎮孟津兼相帥末德由太
子太師爲相帥同日宣制末德兼大夫反在顯下顯居
中執政矯情以厚胥吏齟齬自固而已在藩鎮頗縱部
曲樓下論者非之子希逸字仲莊以蔭補供奉官好學
尤熟唐史聚書萬餘卷咸平初改殿中丞直史館預脩
冊府元龜加祠部員外郎卒

論曰七人者起小吏鮮勲勞徒以謹敏給事潛藩驟登
樞要飛蚊攀鴻翮而翔四海所遭然也稍知問學者柴
禹錫楊守一趙鎔習軍旅者周瑩王顯優理財者張遜
禹錫朋比遜媚瑩酷濫顯浮沉自固皆所謂處非其

據者獨上繼英差賢天子始終倚任然沮抑雷有終猶未脫近倖之恒態哉

陶穀

扈蒙

王著

王祐

子旭孫質

楊昭儉

魚崇諒

張澹

高錫

從子亮

陶穀字秀實邠州人本姓唐避晉祖諱改焉祖彥謙爲刺史有詩名自號鹿門先生父渙夷州刺史唐季之亂爲邠帥楊崇本所害穀幼能屬文起家單州軍事判官嘗以書干宰相李崧時和凝亦爲相同奏爲集賢校理改監察御史遷虞部員外郎知制誥加倉部郎中蘇逢

吉誘告崧崧族子昉往候崧語曰邇來朝廷於我有何
議昉曰無他聞唯陶給事往往厚誣崧歎曰吾何負於
陶氏子哉及崧遇禍昉嘗因公事詣穀穀曰李氏之禍
穀出力焉昉聞之汗出穀性急率嘗與兌帥安審信集
會杯酒相失爲審信所奏左官俄拜中書舍人開運三
年契丹主北歸脅穀令從行穀頗亡曆數謂同輩曰西
南五星連珠漢地當有王者出契丹主必不得歸國及
耶律德光死有字光芒指北穀曰自此契丹自相魚肉
永不亂華矣遂歸漢爲給事中仕周遷戶部侍郎從征
太原時魚崇諒迎母後至穀乘間言崇諒顧望世宗頗

疑之詔許歸陝州就養以穀爲翰林學士世宗命徐台
符以下二十餘人各撰爲君難爲臣不易論平邊策以
進其策率以脩德來遠爲意惟穀與竇儀楊昭儉王朴
以封疆密邇江淮當用師取之世宗思混一天下及覽
其策忻然聽納顯德中遷至吏部侍郎加承旨宋初轉
禮部尚書依前翰林承旨竇儀有公輔望慮其軋已嘗
附趙普輩共排儀儀終不至相位乾德二年判吏部銓
兼知貢舉再爲南郊禮儀使法物制度多穀所定庫部
員外郎王貽孫周易博士奚嶼同考試品官子弟穀屬
其子鄧於嶼部書不通以合格聞俄爲人所發奪穀奉

穀後累加刑部戶部二尚書卒年六十八贈右僕射穀
強記嗜學多蓄法書名畫善隸書然奔競務進見後學
有文采者必極言譽之聞達官有聞望者則巧詆排之
事又見趙上交傳初太祖將受禪未有禪文穀在旁出
諸懷中進之曰已成矣太祖甚薄之嘗自曰吾頭骨法
相非常當戴貂蟬冠爾蓋有意大用也

扈蒙字日用幽州人晉第進士歷仕漢周至知制誥蒙
從弟載爲翰林學士兄弟並掌內外制時號二扈宋初
蒙由中書舍人遷翰林學士坐請託貶秩稍遷左補闕
數年復知制誥充史館修撰開寶九年正月受朝乾元

殿降王在列聲明大備蒙上聖功頌以述太祖受禪平
一天下之功詔褒之爲盧多遜所惡出知江陵府太宗
卽位召復翰林學士轉戶部侍郎加承旨久之被疾以
工部尚書致仕卒年七十二贈右僕射自張昭寶儀卒
典章儀注多蒙所定初太祖親郊以宣祖配天及太宗
卽位禮官以爲舜郊嚳商郊冥周郊后稷王業所因也
若漢高之太公光武之南頓君雖有帝父之尊而無預
配天之祭宜以太祖配太宗將東封蒙定議曰嚴父莫
大於配天請以宣祖配遂行其禮識者非之蒙好釋典
不喜殺縉紳稱善人有笑疾雖上前不自禁多著述有

鰲山集行於世載字仲熙五代史有傳

王著字成象渾父人性豁達無城府漢第進士周爲翰林學士加金部郎中知制誥宋初加中書舍人建隆二年亳州獻紫芝鄆州獲白兔隴州貢黃鸝鷁著獻頌因以規諫詔褒之乾德元年宿直禁中被酒髮散被面夜扣滋德殿門求見帝怒發其醉宿倡家之過黜爲比部員外郎開寶元年復爲翰林學士加兵部郎中辛年四十二著少有俊才世宗念幕府舊僚屢欲相之以其嗜酒故遲留善與人交好延譽後進當世工大夫稱之

王祐字景叔大名萃人祖言仕唐黎陽令父徹第後唐

進士至左拾遺祜少篤志詞學晉杜重威辟爲觀察支
使漢初重威移鎮睢陽祜苦勸使無反不聽祜坐貶仕
周歷魏縣南樂二令太祖受禪累遷知制誥戶部員外
郎符彥卿鎮大名頗不治太祖以祜代之俾察彥卿動
靜謂曰此卿故鄉所謂畫錦者也祜以百口明彥卿無
罪且曰五代之君多因猜忌殺無辜故享國不永願以
爲戒彥卿由是獲免故世謂祜有陰德徙知襄州潭州
召還攝判吏部銓盧多遜素惡祜遂出祜爲鎮國軍行
軍司馬太宗遷至兵部侍郎卒年六十四初祜掌誥會
盧多遜爲學士陰傾趙普多遜累諷祜比已祜不從一

日以宇文融排張說事勸釋之多遜滋不悅及普再入多遜果敗與宇文融事頗類識者服其先見子懿旦旭懿第進士嘗知袁州有政績旦自有傳

旭字仲明以蔭補太祝嘗知緱氏縣官鄰邑者多貪猥氏有末寧三鏹緱氏一鏹之謠真宗累遷至殿中丞自旦居宰府旭以嫌不任職真宗召旦謂曰朝廷任才豈以卿故屈之邪由兵部郎中出知應天府卒懿子睦旭子質皆知名

質字子野以蔭登仕獻文召試賜進士及第累遷判尚書刑部吏部南曹知蔡州州人歲時祀吳元濟廟質曰

安有逆醜而廟食於民者毀之爲更立狄仁傑李愬像
祠之又知壽州徙廬州盜殺其徒并貲而遁捕得之實
論盜死大理以謂法不當死降監舒州靈仙觀逾年韓
琦知審刑院請盜殺其徒非自首者勿原著爲令於是
論者謂質非罪起知泰州累擢天章閣待制出知陝州
卒質家世富貴克已好善自奉簡素如寒士不喜蓄財
至不能自給初旦爲中書舍人家貧與昆弟貸人息錢
違期償以所乘馬質閱書得故券召子弟示之曰此吾
家素風爾曹當毋忘也范仲淹貶饒州治朞黨方急或
謂質載酒往餞質曰范公賢者得爲之黨幸矣

楊昭儉字仲寶京兆人曾祖嗣復祖授竝仕唐至尚書
父景梁左諫議大夫昭儉後唐登進士第累遷殿中侍
御史晉爲翰林學士時驕將張彥澤鎮涇原暴殺從事
張式朝廷不加罪昭儉與刑部郎中李濤諫議大夫鄭
受益抗疏請置之法不報昭儉復上疏極論由是權臣
忌之會請告洛陽不赴晉祖喪爲有司所糾停官未幾
起爲河南少尹改祕書少監尋復中書舍人周世宗愛
其才復召入翰林爲學士歲餘改御史中丞以鞫獄之
失出爲武勝軍節度行軍司馬開寶中入爲太子詹事
以工部尚書致仕太宗卽位就加禮部尚書卒年七十

六昭儉美風儀善談名理事育有直聲然利口喜譏訾
執政大臣懼其構謗多曲徇其意

魚崇諒字仲益其先山陽人後徙於陝初名崇遠避漢
祖諱改之清泰三年爲陝州司馬仕晉歷屯田員外郎
知制誥開運末契丹入汴契丹相張礪薦爲翰林學士
漢祖之入盡索崇諒所受契丹詔敕焚於朝堂復令知
制誥俄拜翰林學士就加中書舍人隱帝卽位以母老
求就養除保義軍節度副使領台州刺史食郡奉王仁
裕罷內職復召崇諒爲學士廣順初加工部侍郎崇諒
求解官歸養詔給長告賜其母衣服繒帛茶藥緡錢俄

拜禮部侍郎復爲學士詔令侍母歸闕世宗征高平崇諒尚未至陶穀譖之遂許歸陝州就養語在陶穀傳訖太祖朝不起太宗卽位詔授尚書兵部侍郎致仕卒

張澹字成文河南人好學有才藻在晉登進士第宰相桑維翰器之妻以女歷吏部員外郎史館脩撰周恭帝初拜右司員外郎知制誥宋初加祠部郎中會祕書郎張去華上書自薦有文藝願與澹及盧多遜師頌竝試覈定優劣太祖令竝試於講武殿澹所對不應策問貶秩後歷知制誥權直學士院卒年五十六澹美風儀善談論歷官釐務所至皆治初黜居郎署頗怏怏晚年附

會盧多遜方再獲進用太宗論及文士曰澹典書命而試以策非其所長此蓋陶穀高錫黨張去華以汨澹爾若使穀輩出其不意而遽試之豈有不失律者邪

高錫字天福河中人漢第進士坐事停官周顯德初徒步詣招諫匭上書言時事疏奏不報世宗嘗令翰林學士分撰俳優詞付教坊肄習以奉游宴錫復上疏諫後爲蔡州防禦推官宋初棄官詣匭上疏請禁兵器疏入不報後又以書干宰相范質奏用爲著作佐郎遷知制誥加屯田員外郎太宗尹京石熙載在幕中錫弟銑應進士舉千熙載首薦熙載不許錫深銜之數於帝前言

熙載裨贊無狀帝具以語太宗對曰慮爲錫所構帝大
悟會使青州私受節帥賂遺又嘗致書澧州刺史爲僧
求紫衣爲人所告謫遠州終陳州別駕卒兄子冕字子
莊周顯德中詣闕上書稱旨授將仕郎守右補闕宋初
累至膳部郎中知益州卒贈右諫議大夫

論曰藝祖謂翰林深嚴當以宿儒處豈非確言要之舍
人與學士分掌內外制均有繩違箴闕之責未可軒輊
論也陶穀險詖無恥王著酣營少檢張澹附勢覬榮楊
昭儉高錫並喜訾造讒茲豈儒者所爲哉扈蒙頗篤厚
然配天改議顧不逮蘇易簡之爲見無忝厥職歟王祐

魚崇諒位不稱德一
齊褒寵一
昌子孫爲善者其勸矣

宋史新編卷七十五

宋史新編卷七十六

列傳十八

明南京戶部主事莆田柯維騏著

劇可久

趙逢

蘇撓

高防

馮璣

邊珣

王明

許仲宣

楊克讓

段思恭

侯陟

李符

魏丕

董樞

劇可久字尚賢范陽人沉毅方正明律令與馮道趙鳳
爲友後唐同光初以鳳薦歷著作郎仕晉歷大理卿周
初改太僕卿分司西京坐失舉停任復起爲右庶子世
宗以刑書深古條目繁細難於檢討又前後敕格重互

亦難詳審於是中書門下奏曰伏以刑法者御人之銜
勒救弊之斧斤將救舞文之弊宜伸畫一之規命張湜
劇可久等十人編集從之書成凡三十卷目曰刑統可
久復拜大理卿建隆三年告老改光祿卿致仕卒年七
十七可久在廷尉四十年用法平允以仁恕稱

趙逢字常夫媯州人漢舉進士甲科解褐授祕書郎直
史館周歷水部郎中掌誥命宋初拜中書舍人坐事貶
乾德初召授都官郎中知制誥二年判昭文館未幾充
樞密直學士加左諫議大夫蜀平出知閬州代還遷給
事中充職太祖征太原以逢爲隨軍轉運使鑄印賜之

數年卒逢性剛直有吏幹揚歷清近所至有聲然傷慘酷又言多詆訐縉紳目爲鐵檠

蘇曉字長東武功人漢祖鎮太原表爲觀察支使周廣順初爲大理正以獄獄有功遷少卿顯德中歷屯田郎中宋初詔同詳定刑統旣而權大理少卿事累擢右諫議大夫判大理寺賜金紫轉左諫議大夫卒曉深文少恩號爲酷吏

高防字脩已并州人性沉厚守禮法累世將家父從慶與梁軍戰死防年十六護柩以歸事母孝好學善爲詩初張從恩移澶州防禦使表爲判官有親校段洪進盜

官木造器市取其直從恩將殺之洪進曰判官使爲之防卽引伏洪進得免後從恩知其自誣以活人益加禮重隨從恩歷鄆晉潞三鎮判官契丹入汴從恩欲歸款防爲陳逆順不聽歸契丹命副使趙行遷知留後從恩所親王守恩爲巡檢與防同領郡事防與守恩謀誅行遷以城歸漢祖加檢校金部郎中乾祐初授屯田員外郎改浚儀令未幾免職周祖卽位復起再遷刑部郎中獻獄無遁情後歷知諸州遷至戶部侍郎咸有勞績太祖征李筠防爲潞州東北路計度轉運使澤潞平拜尚書左丞建隆二年出知秦州州產大木夏人利之防議

建採造務築堡要地以渭爲界夏人涉渭奪木筏殺役
兵防出與戰俘四十七人以獻太祖慮擾邊詔諭酋帥
賜所獲俘錦袍銀帶遣之遂罷採木之役命吳廷祚爲
節度代防歸爲樞密直學士復出知鳳翔卒年五十九
帝以素尚清白詔厚賻焉

馮瓚字禮臣歷城人性便佞任數務巧進以蔭歷仕晉
漢周至祠部郎中充集賢院直學士太祖甚寵之擢至
左諫議大夫出知舒州境內有菰蒲魚鱉之饒居民採
以自給瓚奏蠲其稅徙知廬州乾德三年以本官充樞
密直學士時劔外初平命瓚知梓州無何蜀軍校上官

進率亡命三千餘人掠民數萬夜攻州城瓚曰賊乘夜
奄至此烏合之衆以筆挺相擊必無固志正可持重以
鎮之且自潰矣密令促其更籌五鼓賊悉遁去因縱兵
追之擒上官進斬於市初太祖欲任用瓚常與趙普言
瓚有奇才普忌之乃遣詣蜀平寇潛令所親信從其行
密察其過卽亡入京師擊登聞鼓訟瓚受賂爲姦事太
祖欲貸其死普固執不可乃削籍流登州沙門島瓚在
海上凡十年不得召開寶末赦還太宗起歷度支判官
遷至祕書少監又改大理卿兼判祕書省以足疾求解
除給事中致仕復舊勳階卒

邊珣字待價華州鄭人晉天福六年第進士歷仕漢周至職方員外郎知通州課鬻鹽於狼山歲增萬餘石宋初兄玘自河南令入爲吏部員外郎復以珣爲洛陽令兄弟迭尹赤邑時人榮之開寶初遷職方郎中監京兆麴務又掌永安軍權貨奏徙務揚州就命權知州事會征江表兼領淮南轉運使金陵平知江北諸州轉運事太宗遷吏部郎中召還賜金紫充廣南轉運使代歸拜右諫議大夫後知開封府卒

王明字如誨大名人晉舉進士不第樂元福爲原州刺史辟爲從事馮暉節制靈武表爲觀察巡官周廣順初

元福領陳州防禦使奏署判官會劉崇寇晉州命元福將兵援之事多咨於明先是州縣吏部送丁壯餉糧一夕夫盡遁去元福怒盡驅官吏出軍門將就戮明馳往白元福曰今軍儲無闕不如寬以待之賊敗凱旋公無專殺之名不亦善乎盡免其死旣而崇衆宵遁卽命元福爲建雄軍節度留鎮因奏署明爲書記賜緋魚顯德初元福移鎮陝恃功驕恣明以直道見疎因謝絕之詣闕上書求任州縣歷清平郾城二縣令宋初歷遷右補闕會用兵嶺南選爲荆湖轉運使開寶三年大舉南征爲隨軍轉運使旣而賀州未下明入與主帥計當急取

之因抵廣州賊衆十餘萬拒戰明與都部署潘美等謀
逆擊斬首數萬廣州平爲太道轉運使擢授祕書少監
領韶州刺史充轉運使俄以潘美尹崇珂爲嶺南轉運
使以明爲副使無名科斂悉條奏除之嶺表遂安代歸
帝召見勞問是歲將用師南唐以明爲黃州刺史帝密
授成筭俄而王師乘戰艦而下卽以明爲江路巡檢戰
擢都部署擊鄂州軍於江南時南唐將朱令贇自上江
領衆十五萬將焚采石浮梁抵金陵爲援明遣其子馳
奏請添造戰艦襲令贇帝曰非應急策也密遣人諭明
令樹長木於洲浦間若帆檣狀令贇望見果疑大軍襲

其後逗撓不敢進明與諸軍合勢大破之擒合贊金陵
平詔明安撫諸郡因命知洪州太宗卽位累遷禮部侍
郎會契丹擾邊以明知真定府契丹遁去淳化初召還
知京朝官差遣事卒子挺扶竝進士及第歷臺省皆知
名

許仲宣字希榮青州人漢乾祐中登進士第時年十八
周歷淄州團練判官宋初赴召引對便殿太祖悅其氣
貌雄偉擢授太子中允受詔知北海軍仲宣度其山川
形勢地理廣袤可以爲州郡因畫圖上之遂升爲維州
從征并門掌給納四十餘州資糧悉能集事南唐平以

潛輓功拜刑部郎中太宗累遷給事中卒仲宣性寬恕
倜儻不檢有心計初爲濟陰主簿時令與簿分掌縣印
令畜嬖妾與其室爭寵令弗能禁嬖欲陷其主竊取其
印藏之封識如故以授仲宣翌日發匣無其印因逮捕
縣吏數輩及令簿家人下獄鞫問果得之於令舍竈突
中令聞之倉皇失措仲宣處之晏然人服其量嘗從征
江南都部署曹彬令取陶器數萬給士卒爲燈具仲宣
已預料置奉之如其數其才幹類此

楊克讓字慶孫馮翊人晉末舉進士不第州將劉繼勳
辟爲戶曹掾歷漢周遷至延州觀察推官累加朝散大

夫兼殿中侍御史連以家難去職太祖起爲左補闕乾
德六年知果州開寶三年爲西川轉運副使蜀民懷其
善政璽書褒美代歸闕下疏民利病十事稱旨太祖召
升殿賜坐勞問面賜金紫將大用爲侯陟所沮事見陟
傳歷知廣州兼轉運市舶使卒克讓少好學歷官廉謹
幹局所至有聲子希閔字無間生而失明令諸弟讀經
史一歷耳輒不能忘屬文善緘尺趙普守西洛府中牋
疏皆希閔所爲將奏署本府掾固辭不受早卒有集二
十卷自教三子日華日嚴日休皆登進士第希閔弟希
甫從子日宣亦登進士第

段思恭晉城人在晉以父蔭登仕歷漢周至左司員外郎宋初除開封令遷金部郎中蜀平通判石州時亡命集衆攻逼州城思恭募軍士先登者厚賞於是諸軍賞勇大敗賊思恭矯詔以上供錢帛給之度支請按其罪太祖憐其果幹不許令知州事丁母憂起復俄召爲考功郎中知泗州會馮繼業自靈州舉宗來朝以思恭代知州事至則悉矯繼業之失綏撫吏落訪求民病奏免之遷右諫議大夫知揚州朝廷方經略江表命兼沿江巡檢與通判李岩相告訐降秩知宿州太宗卽位遷將作監知秦州又坐不法爲通判王延範所發降秩知邢

州後知壽州累遷給事中尋知陝州卒思恭不知書無學術然踐吏吏事所至必著勤績云

侯陟淄州人漢末舉明經周歷襄邑令建隆初爲冤句令以清幹聞就遷左拾遺節度袁彥頗爲不法陟抗章言之歷左司員外郎權判吏部銓出知揚州會出師收金陵陟以所部敗南唐軍於宣化城俄爲部下所訟乃求哀盧多遜多遜素與善爲畫計時江表未拔太祖議休兵以爲後圖陟適從揚州來知金陵危甚令上急變求見大言曰南唐平在朝夕陛下奈何欲班師願急取之遂寢前議竝赦陟罪復知吏部選事太平興國中累

遷左諫議大夫權御史中丞事初趙普在中書陟掌上
疏言其短至是普再入相陟頗憂恚加給事中同判三
司卒贈工部尚書陟有吏幹性狡獪好進善事權貴巧
中傷人太祖問識楊克讓否對曰臣與克讓甚善知其
才識朝廷佳士也近聞其自言上許以大用多市白金
作飲器以自奉臣頗恠之上怒亟出克讓典郡焉

李符字德昌大名人漢歷大理正乾德中知歸州轉運
司制置歸朝以京西諸州錢帛不登選知京西南面轉
運事奏便宜百餘條凡四十八事命著爲令因奏對稱
旨遷起居郎太祖欲幸西京有事于南郊符上書陳八

難不從改比部員外郎判刑部太平興國中連遷祠部
郎中知廣州兼轉運使在任有善政民爲立生祠召爲
右諫議大夫歷知開封府趙普令符上言廷美在西洛
非便遂有房陵之貶普恐泄以事貶符寧國軍行軍司
馬盧多遜貶崖州也符白普春州瘴毒益徙處之普不
答及符貶德超屢稱其冤會德超以事貶帝惡其朋黨
徙符嶺表普移符知春州歲餘卒符無文學有吏幹好
希人主意以干進終以此敗

魏丕字齊物相州人頗涉學問周世宗鎮澶淵辟司法
參軍有盜五人獄具不疑其冤緩之不數日果獲真盜

歷三縣令世宗卽位累遷供備庫副使太祖卽位改作坊副使時楊承信帥河中或言其友側未安命不賜承信生辰禮物陰察之還言其無狀以久次轉正使領代州刺史凡典工作十餘年討澤潞維楊下荆廣收川峽征河東平江南太祖皆先期諭旨令脩舩器械無不精辦太宗累遷黃州刺史還朝作歌以獻因自述願授臺省之職上面諭曰知卿本儒生然清望官奉給不若刺史之優也遷至左驍衛大將軍卒年八十一

董樞真定人後唐以獻書得官歷晉周至殿中侍御史乾德初遷主客員外郎上書請伐蜀蜀平通判劍州遷

比部郎中三年出兼桂陽監使上書請伐廣南詔益桂陽戍卒三千令樞統領開寶二年又上方略會劉鋹遣內侍曾居實侵桂陽監樞擊退三年大舉伐鋹令樞率兵趨連口克之改兵部郎中權知連州兼行營招撫使嶺南平賜錢三百萬四年移知襄州又爲河北轉運使改判西京留司御史臺初樞罷桂陽監左贊善大夫孔璘太子洗馬趙瑜相繼代之及瑜歲滿代者著作郎張侃奏瑜在任累月得羨銀數千斤計樞與璘隱沒可知詔下御史獄當死太祖曰趙瑜非自盜但不能發擿耳樞璘並坐死瑜決杖流海島權侃屯田員外郎

論曰人臣近君者列卿侍從近民者監司守倅苟咸得人天下何憂弗治太祖更制內外迭出入尤慎遴選若劇可久用法仁恕高防著勞澤潞馮瓚兵略邊羽郡績王明戰功許仲宣心計楊克讓幹局段思恭便宜平寇難魏丕工作濟戎事當大業開創撥亂反正之初諸人者一切彰彰有政迹或未免少疵固弗論况曩行可稱者哉趙逢蘇曉慘酷少恩如治體何侯陟嫉賢巧中傷與鬼蜮何異李符希旨深文竟投荒自弊爲天下笑董樞貪冒不克令終彼皆嘗效知謀所至治辨乃小人之才云

馬令琮

杜漢徽

張廷翰

吳虔裕

蔡審廷

周廣

張勳

石曦

張藏英

陸萬友

解暉

李韜

王晉卿

郭廷謂

子延澤

趙延進

輔超

馬令琮本名令威避周祖名改之大名人父全節五代
史有傳令琮少善騎射嘗從其父平安州及與鎮州安
重榮戰皆有功歷仕晉漢周至虎捷左第一軍都指揮
使兼領建州刺史太祖卽位出刺懷州帝將親征李筠

令琮日夜儲蓄以俟王師太祖善之授團練使又充先鋒都指揮使澤潞平爲昭義兵馬鈐轄卒

杜漢徽京兆人有膂力善騎射後唐累遷護聖軍使歷晉漢周遷至本軍左第四軍都虞候宋初補本軍都校領潮州刺史從平李筠及李重進錄功居多建隆三年出爲天長軍使移雄武軍使知屯田事是冬被病請告歸京家人勸其求醫藥漢徽笑曰我在戎行四十年大小百餘戰不死幸矣安用藥爲未幾卒

張廷翰冀州人少慷慨有智略善騎射晉時爲牢城軍校遭契丹之變州人共推廷翰知州事漢初就拜刺史

周歷棣海沂三州團練使屢率兵敗淮人移萊州宋初
又歷冀毫二州卒

吳虔裕許州人少爲郡吏漢歷宣徽北院使周歷右衛
左金吾衛二大將軍兼街仗使太平興國六年遷右千
牛衛上將軍仍判左街仗事掌金吾三十餘年卒年八
十八贈太尉虔裕性簡率言多輕肆右金吾上將軍王
彥超告老虔裕語人曰我縱僵仆殿階下斷不學王彥
超七十致仕人傳笑之

蔡審廷磁州人少能騎射晉應募補護聖散都頭周累
擢副指揮使宋初授殿前散都頭指揮使從征李筠攻

澤州先登爲飛石傷足賜資甚厚歷鎮州兵馬都鈐轄卒

周廣字大均應州人父密事晉爲節度使周至太子太師致仕廣幼從其父爲牙校歷漢周至眉州刺史宋授隰州刺史遷潘州團練使從征太原還加秩後改右屯衛大將軍領郡如故卒

張勳洛陽人晉景延廣表爲供奉官周歷霸州兵馬都監宋初征李筠破澤州皆預有功命權知許州荊湖平以功就拜衡州刺史後克郴州及桂陽監以勳爲刺史兼監使卒勳性殘忍每攻破城邑頗有橫惟鋒刃者將

赴衡州州民涕泣相謂曰吾輩何以安乎

王羲太原人晉祖弟韓王暉之子天福中爲右神武將軍歷漢周爲左衛將軍建隆中遷左驍衛大將軍護秦州屯兵西人犯邊羲率所領擊破之太祖征晉羲領兵自澤潞除道至太原墜汾水灌其城又益兵部攻遼州俄知雄州代爲潭州鈐轄開寶八年領兵敗南唐軍平諸洞蠻寇太宗累遷右龍武軍大將軍卒

張藏英范陽人唐末舉族爲賊孫居道所害藏英年十七僅以身免後逢居道幽州市引佩刀刺之不死爲吏所執節帥趙德鈞壯之釋不問以補牙職居道避地關

南藏英求爲關南都巡檢使至則微服攜鐵槌匿居道舍側伺擊仆於地齧其耳致之遂禽歸設父母位陳酒肴縛居道於前號泣鞭之齧其肉經三日刳其心以祭卽詣官首服官爲上請而釋之燕剌間目爲報讎張孝子仕契丹旣而歸周歷濮州刺史頡邊任屢敗契丹兵征瓦橋關爲先鋒都指揮使又改關南排陣使宋初遷瀛州團練使并護關南軍卒孫鑑自有傳

陸萬友靈丘人少隸太原爲裨校漢歷天雄軍馬軍都指揮使周祖之起兵也萬友預謀及踐阼擢至安州防禦使宋遷至右監門衛大將軍充河陰兵馬都監卒萬

友始業巧鑊既貴達不忘本以銀爲巧鑊器數十事示子孫性猛暴以武勇自任所至無善政太宗以勳舊恩遇不替爲許王聘其次女

解暉臨洛人後唐時父珪從軍沒於陣暉得隸兵籍以功遷奉國軍隊長歷晉周遷至虎捷第一軍都虞候宋初爲少軍都軍頭澤州策勳爲內外馬步軍副都軍頭乾德元年充湖廣道行營前軍戰罷都指揮使潭州而陞書獎諭僞統軍黃從志據岳州暉討平之生禽從志改控鶴右第二軍都指揮使領高州刺史後又破太原軍改均州刺史太平興國初爲威勝軍使從征并州兵

招討使李諱等六人復分攻太原以功遷本州團練使知霸州雍熙初充雲應襄荊忻代等州都巡檢使三年代歸本郡淳化二年被病告老改右千牛衛上將軍致仕詔未至卒年八十暉驚猛木強每受詔征伐常身先之由是頻立戰功金創徧體時稱驍將

李韜河朔人爲禁軍隊長周祖征三叛韜從白文珂攻河中兵薄其城文珂夜詣周祖議犒軍留韜城下時營柵未備李守貞乘虛來襲營中惶怖失據韜援稍而進死士十餘輩隨韜犯賊鋒有猛將躍馬持戈擬韜韜刺之洞胷而墜又連殺數十人大破之韜由此知名累遷

軍校出爲趙州刺史移慈州開寶元年卒

王晉卿河朔人初以藝勇隸周世宗帳下及卽位補供奉官累立戰功歷擢龍捷右第一軍都指揮使領彭州刺史恭帝卽位出爲濱州刺史乾德中自興州移漢州時蜀初平寇盜充斥晉卿設方略盡禽之自是雖劇賊無敢窺其境然以賄聞太祖惜其才置不問歷莫州刺史士卒樂爲用邊民安堵

郭廷謂字信臣彭城人父全義仕南唐爲濠州觀察使廷謂幼好學工書善騎射補濠州中軍使李景每令偵中朝機事入奏翟莊宅使濠州監軍屢敗周師遷至滁

州刺史上淮巡檢應援兵馬都監及紫金山之戰諸將
多歸降者獨廷謂以全軍還守濠州俄加本州團練使
是秋周師復至表于景請援援兵不至降于周世宗特
加宴勞拜亳州防禦使命攻天長軍降其將馬贇又爲
樓櫓戰櫓左右廂都監俄歸譙郡宋初從征上黨再知
亳州歷靜江軍節度觀察留後卒年五十四廷謂性恭
謹事母以孝聞未嘗不束帶立侍子延濬兄子延澤

延濬字利川初爲桂州牙內都指揮使父卒太祖錄爲
供奉官太宗歷改崇儀使李順亂又改西京作坊使充
成都十州都巡檢使合王繼恩兵破賊斬首千餘級繼

恩又請延濬知漢州錄功改洛苑使又命率兵屯遂州
劔門鈐轄轉運使上其勞詔書嘉獎真宗初改內園使
代還會河朔用兵延濬馳往邊城按視砦壘以疾卒

延澤字德潤南唐試祕書省正字宋初歷殿中丞知建
州太宗聞延澤泊董元亨皆好學詔宰相召問經史皆
條對稱旨命爲史館檢討歷國子博士咸平中求休退
授虞部員外郎致仕居濠州城南有小園以自娛其詠
牡丹千餘首聚圖籍萬餘卷元亨亦至虞部員外郎嘗
續玄門碑誌三十卷

趙延進頓丘人父暉周太子太師延進右千牛衛將軍

濠州兵馬鈐轄從征瓦橋關爲隨軍金吾街仗使宋初
歷官權判右金吾街仗使歷知河中府梓相青三州太
平興國中累功遷右監門衛六將軍知鎮州及代吏民
數千守闕借留詔許留一年歷右驍衛大將軍改知鄧
州淳化初飛蝗不入境詔褒之至右金吾衛大將軍卒
年七十三贈左武衛上將軍延進涉獵經史好作詩什
妻卽淑德皇后之妹子昂登進士第

輔超秀容人晉隸澶州軍籍漢以功補小校顯德中以
功轉日騎副兵馬使宋初從平上黨再遷內直都知太
宗以爲馬軍都軍頭會親征太原冒矢石攀堞先登身

被十三創帝嘉其勇賜袍帶詰朝再乘城中流矢者八
復厚賜歷加都軍頭領澄州刺史真宗連拜萊州團練
使以年老願留京師從之卒年七十七

論曰語有之千金之裘非一狐之腋方太祖初得天下
所資經營鎮撫之臣何可勝數哉馬令琮輩或典金吾
或鎮方州或從征討雖操行靡一而勞績則均令琮儲
蓄迎王師解暉陷堅禽敵將趙延進歷數州多異政其
忠其勇其惠尤足稱者郭廷謂孝而加恪張藏英爲親
復讎斯又有裨於俗獨爲國爪牙已乎